

# 1 Timoteo

## Pauloŋe Timoteohât ekap aŋgoân kulempuop.

---

**1** <sup>1</sup>O nanne Timoteo,  
Nâmâ Paulo. Anitâ Tihit tihit Amboŋaŋe Yesu Kiristo orop biwiyetŋe kepeiakmâ konohâk otmu Kiristohât aposolo katnekmâ âi nihimutâ mem mansan. <sup>2</sup>Âi ya mem Kiristohât den pat ekghomune nâŋgârâ bulâŋe otmu nanŋe âwâŋaŋe tânahomawot yakât dopŋeâk yâkâlen biwinetŋaŋe kepeim tânahom hoŋ bawaŋgimait. Otmu Kiristoŋe âwurem ge nine lohimbî sâmbâ menenekmu manman kârikŋan mannongât nâŋgâm biwinenŋaŋe mem mansain. Otmu gâhât nâŋgâm Anitâ yuwu sâmbâ ulitguman. “O Awoŋ, gâ Kutdânenŋe Yesu Kiristo orop Timoteo nâŋgâwawŋim tihitŋe otmutâ biwiŋe sâmbâ sâekgât ulitgohan.” Yawu sâmbâ ulitguman.

### **Lok nombotŋaŋe Kiristohât den pat âlepŋe kelangatbi.**

<sup>3</sup>Nâŋe aŋgoân Epeso kapi pilâm Makeronia hânân yu takawe sâmbâ den ekghowan ya âlâkuâk sâmbâ nâŋgâ. Epeso kapi ambolipŋe nombotŋaŋe yeŋe engatyeneâk watmâ Anitâhât den bukulipyeŋe kâsikum yingim gai. Yawu gârâmâ den ya kelangatmâ kâsikum yingim gai ya nâŋgâmbâ Kiristohât den pat yawu ki oap. Yawu gârâmâ gâŋe Epeso kapiân tat yakât otmâ gâŋe kuyingirâ pilânomai. <sup>4</sup>Yâkŋe Anitâhât den ya wangim tâmbâlipyenŋe yeŋe biwiyenambâ den âlâlâ tetemu alahum gawi ya torokatmâ kâsikum yingimai. Otmu tâmbâlipyenŋe yengât topyeŋe girawu tap yakât sâmbâ âi pâi tuhuakmai. Yawu otmai yan Kiristohâlen biwiyenŋe tiŋâk ki kepeimai. Yakât otmâ nâŋgân nâŋgânyeŋe hâlim milim otmu manmanyenŋe ki kelihakmap. Yakât otmâ gâŋe kuyingirâ pilânomaihât nanŋan. <sup>5</sup>Nenŋe Kiristohât den pat âlepŋe yu lohimbî kâsikum yingimunŋe nâŋgânetâ bulâŋe otmu yâkâlen biwiyenŋe tiŋâk kepeinomaihât yâkŋe menenekmâ âi sâmbâ ningiop.

Otmu yâkâlen biwiyenaje kepeiñetâ tosayenje pilâyîngimu biwiyenje sânduk sâmu yanak bukulipyenje orop biwiyenaje kepeiakmâ konohâk otmu nanğanğimai. Yawu otmâ Kiristohât mâtâp tâñ tâñâk watmai. <sup>6</sup>Yawu gârâmâ lohimbi ya yengât topyenje ekgohoan yañe Kiristohât mâtâp ya tâpikgum den tâñât alahumai. <sup>7</sup>Otmu emelâk Anitâñe girem den âlâlâ Mose ekumu kulemguop ya nenñe topñambâek nânğâm bukulpnenñe kâsikum yîngiain sâmai. Yawu sâmai yamâ yene girem den yakât topñahât pâpgum ki kâsikum yîngim henğenğumai. Yakât otmâ gâñe kuyîngirâ pilânomaihât nanğan.

<sup>8</sup>Aiop, Anitâñe girem den âlâlâ Mose ekumu kulemguop yakât yuwu sâmunne nânğâ. Yamâ âlepñeâk hârok. Yakât torehenñe âlâ ki tâpihahop. Yawu gârâmâ lohimbi nombotñaje girem den âlâlâ yakât andemñe wangim yene nânğân nânğânyenambâek den torokatmai ya watmunñe umatñe otmap. <sup>9</sup>Otmu lohimbi uwawañe bia manmai ya yengât nânğâm papatolipnenñaje girem den ki ekyongomai. Yâhâ lohimbi orotmeme bâleñe otmâ manmaiñe girem den nânğâñetâ biwiyenjan hâumu kuwihakñet sâm ya ekyongomai. Lohimbi yuwuya yengât yan. Lohimbi nombotñaje ândâpyenje kârikñe otmâ papatolipyenje yengât den ki nânğâmai. Me kunyene kârikñe otmâ Anitâhât nânğâñetâ gemu girem den ki watmai. Me âwâ mâmâlipyenje me bukulipyenje yengât nânğâm bâleyîngim yongonjetâ mumai. <sup>10</sup>Nombotñajeâmâ nep tuhuninginjet sâm lohimbi me nimnaom titipâ meyekmâ ip kârikñaje hikuyekñetâ tatmâ yâk yengât âi tuhuyîngimai. Lohimbi nombotñaje loklipyenje me imbilipyenje betyenñe kionmai. Me loklipyenñe imbilipyenje pilâyekmâ lok bukulipyenje orop ekñâleangimai. Otmu imbilipyenñe gurâ yawuâk loklipyenje pilâyekmâ imbi bukulipyenje orop ekñâleangim orotmeme kiñon otmai. Lohimbi nombotñajeâmâ den perâkñe sâm bukulipyenje kâityongomai. Nombotñajeâmâ bukulipyenje yengât imbiâk den hakyenjan sâmai. Yâhâ nombotñajeâmâ Anitâhât den kum otmâ hilipgumai.

<sup>11</sup>Kiristohât hoñ bawalipñaje Anitâhât girem den ya tâñ tâñâk kâsikum yîngimai yamâ nâñe Kiristohât den pat âlepñe kâsikum yîngiman yu orop lâuaksawot. Den pat âlepñe yu nânğâmain yan Anitâ ikñe topñe nânğâmunñe âlâ kândâkdâ otmu mepaemain.

### **Anitâñe Paulo umam sâwangoiop.**

<sup>12</sup>Kutdânenñe Yesu Kiristohâlen biwinaje kepeim hoñ bawangim yâhâwomgât ikñahâk nânğânihiop. Nânğânihim nep sâm nihimu yâkât wâtñan kinmâ den pat âlepñe lohimbi kâsikum yîngim mansan. Yakât otmâ nâñe heronje nânğâwawangim yâk mepaeman. <sup>13</sup>Yawu gârâmâ nâñe emelâk yâkâlen biwine ki katban sâp yan biwi nânğân nânğânne manguakmu yuwu otmâ manban. Yâkât den pat âlepñe mem

ge katban. Yawu otmâ lohimbiŋe yâkâlen biwiyeŋe katbi ya topŋe âlâlâ maŋgâeyekmâ mem bâleyekminiwan. Yawu otyiŋgiminiwan yamâ Kiristo iŋŋe otbaŋgiminiwan. Yawu otminiwan yan biwi nâŋgân nâŋgânne maŋguakmu ki nâŋgâmâk maŋgâeyekminiwan. <sup>14</sup>Yakât otmâ Anitâŋe iŋŋahâk wawaenekmâ nâŋgân nâŋgânne mem pâroŋ pilânihiop. Yawu otmâ biwine mem hewewej tuhumu Yesu Kiristohâlen biwinaŋe kepeiwan. Yawu otban yapâek yâk orop biwinetŋaŋe hikuakmâ konohâk otmu manmâ gan yu. Yakât otmâ iŋŋe komot nâŋgâyiŋgim hoŋ bayiŋgim gaman. <sup>15</sup>Bulâŋanâk Yesu Kiristoŋe nen lohimi bâleŋe sârerenenekmâ tosanenŋe pilâningiâk sâm Anitâŋe yâk hâŋgâŋumu giop. Yakât nâŋgâmunŋe bulâŋe otmu biwinenŋaŋe Kiristohâlen kepeim mannom.

Nâŋe ninahât nâŋgâmune dondâ gemap yakât yuwu sâmune nâŋgâ. <sup>16</sup>Lohimbi kerekŋe otmunŋe bâlemu tosanenŋe orop manbin yakât Anitâŋe mumuhât pat kuniŋgiop. Yâhâ lohimbiŋe otŋetâ bâleop ya wangim nâŋeâmâ dondâ otmune bâlemu tosa pato mewan. Yakât matŋe umatŋe dondâ membomgât dop olop. Yawu gârâmâ Kiristoŋe biwine iŋŋan katbehât nâŋgâm lohotŋan otnihim matŋe ki nihiop. Nine topne yawu tap. Otmu lohimbiŋe yâkâlen biwiyeŋe katŋetâ Anitâŋe manman kârikŋahât pat kuyiŋgiwuap. Yawu otmu Kiristoŋe wawaenekmâ lohotŋan otnihiop yakât den pat ya lohimbiŋe nâŋgâm Anitâ mepaenomai.

Otmu Ambonenŋe Anitâ konok ki ekmain. <sup>17</sup>Yâhâmâ tat tat kârikŋe tatmâ gaopŋak tatmâ gamap. Otmu tatmâ yâhâmbisâp. Yâŋŋe ki teteop. Otmu biatbuapgât dop gurâ ki tap. Lohimbi tuhuyelehowâmbâek kunnenŋe tatmâ tihitnenŋe otmâ gamap. Otmu yawuâk tihitnenŋe otmâ yâhâmbisâp. Yakât otmâ heronŋe nâŋgâwaŋgim mepaem manmâ yâhânom. Ya bonŋanâk.

<sup>18</sup>Nanne Timoteo, yuwu sâmune nâŋgâ. Lohimbi nombotŋaŋe Kiristohât den pat bulâŋe ya kelanŋatmâ bukulipyenŋe kâsikum yingimai sâm gâŋe kuyiŋgirâ pilânomaihât nâŋgâm nep sâm gihiwan. Emelâk Kiristohât komot ya yenŋât kunlipyenŋaŋe âi sâm gihim kungan mewi. Kungan mewi yan âi tuhurâ bulâŋe girawu tetewuap yakât Wâtgât mâmâŋahât Heakŋe biwiyeŋan katmu den ekgohowi. Den ekgohowi ya nâŋgâm Kiristohâlen biwihaŋe tiŋâk kepeim yâkât den pat âlepŋe ya lohimi ekyongom manbuat. Yawu mandâ lohimi âlâ me âlâŋe mâtâp maŋguhine sâm otnomai yan kârihem kinbuat. <sup>19</sup>Yawu mandâ yanâmâ Wâtgât mâmâŋahât Heakŋe biwine ekmu ârândânŋ oap yawu biwihaŋe nâŋgâuwat. Yâhâ lohimi nombotŋaŋe Wâtgât mâmâŋahât Heakŋe biwinenŋe ekmu ki ârândânŋ olop yawu biwiyeŋaŋe nâŋgâwi. Yawu gârâmâ biwiyeŋaŋe yawu nâŋgâm yan Wâtgât mâmâŋahât Heak ya betŋuŋetâ biwiyeŋe pâlâmŋe otmu manmâ ari hiliwahonomaihât pat mansai. <sup>20</sup>Lok yâhâp, kutyetŋe Himenai yet Alesande, yâkŋe yawu otmâ

Anitâ sâmbâlewangim gawot. Yawu olowot yakât nâne ketetyelekmune yaehen ari manmutâ Satanŋe mângâeyelekmu mansawot. Otmu orotmemeyetŋe bâleŋe ya ekmâ nângâm âlâkuâk Kiristohâlen biwiyetŋe kepeim mansetgât nanŋan.

**Kiristohât lohimbije menduhuaknomân yuwu otmâ mannom.**

**2** <sup>1-2</sup>Gâŋeâmâ Kiristohât lohimbi yeŋgât kunyeŋe mansat yakât yuwu sâmbune nângâ. Kiristohât lohimbije menduhuakmâ Anitâhât den ya alahum kiki meytigim mepaeyeleknomaiân ekyongorâ Anitâ yuwu sâmb ulitgunomai. Lohimbi belângen manmaiŋe nângâningiŋetâ ârândân otmu manman sânduhân mannehât nângâm gawamangât lok kunŋe otmu galemlipnenŋe ya tânyongoâk sâmb Anitâ ulitgunomai. Otmu Wâtgât mâmânahât Heakŋe mâmâŋe otningimu Anitâhât tem lâuwangim mannomai. Yawu manmâ lohimbi ewe katyekmâ lohotŋan mannom sâmb Anitâ ulitgunomai. Otmu Anitâ ambonenŋe lohimbi belângen manmai ya nen orop wawaenenekmâ tihitnenŋe otmap yakât nângâm ulitgunomai. <sup>3</sup>Yawu ulitgunetâ yanâmâ Anitâ Manman kâriknahât Amboŋe nângâmu ârândân otuap. <sup>4</sup>Lohimbi kerekŋe Kiristohât den pat âlepŋe ya nângâŋetâ bulâŋe otmu yâkâlen biwiyetŋe katŋetâ manman kâriknahât pat kuyiŋgiwuap yakât Anitâŋe nângâmap. <sup>5-6</sup>Anitâ konok ambonenŋe tatmap. Otmu Yesu Kiristo ikŋak lohimbi kerek nengât tosa hât otmâ ge kawenenŋan kinmu kuŋetâ mumbuap sâmb sâp kalop. Sâp ya ekmu ârândân otmu yanâk kuŋetâ muop. Yakât otmâ lohimbi âlâ me âlâŋe yâkâlen biwiyetŋe kepeimai yamâ Kiristone mem konohân tuhuyekmu biwiyetŋe hikuakmâ konohâk otmu Anitâŋe kaok nângâyŋgim. Otmu kuŋetâ muop yan Anitâŋe lohimbi kerek nengât tosa pilâningim manman kârikŋan torokatnenekbomgât nângâmap yakât topŋe teteop. <sup>7</sup>Topŋe yawuhât pâku lohimbi yeŋgâlen ari Kiristohât den pat âlepŋe kâsikum yŋgimune nângâŋetâ bulâŋe otmu yâkâlen biwiyetŋe kepeim manŋetgât yâkŋe menekmâ aposolo âi sâmb nihiop. Yâhâ gâŋe nâhâitŋe “Bulâŋanâk eknohop,” yawu sâmb den ekgohoan yu Kiristohât komot ekyongorâ nângânomai.

<sup>8</sup>Kiristohât lohimbije wosapâ me wosapâ menduhuakmâ Anitâ yet Kiristo mepaeyelekmai ya yuwu sâmb ekyongowuat. Lok nombotŋe Anitâhât tem lâuwangim bukulipyetŋe orop ki sâmb bâleangim den kakŋan sahangimai. Galemlipyetŋe yawuya katyekŋetâ lohimbi yeŋgât senyeŋan kinmâ Anitâ yu yakât ulitgunomai.

<sup>9-10</sup>Otmu imbilipyetŋe Anitâhâlenâk biwinenŋe kepeim tem lâuwangim mansain sâmb. Ya lok âlâ me âlâŋe yekŋâlemai hât hâkyetŋe tihitŋe otmâ senŋe âlâlâ sekŋe âlep âlep yaŋe ki hâkyetŋe meŋâleaknomai. Otmu imbi ya bukulipyetŋe yekŋetâ yahalâkgât somotyetŋe menderŋomai yan senŋe âlâlâ sekŋe âlepŋe orop ki

menduhum mendenomai. Yawu otmâ loklipyenye ewe katyekmâ amutyenjan mannomai. Yawu manmâ bukulipyenye nembe kalem otyingim tânyongonomai.

<sup>11-12</sup> Imbilipyenyanje loklipyenye yengât amutyenjan mannomaihât nanjan. Yakât otmâ lohimbijne menduhuakmâ Anitâ yet Kiristo mepaeyelekmaiân imbi âlâ me âlâne yahatmâ senyenjan kinmâ den kâsikum yingine sâam otmai yamâ kuyingiman. Yâkneâmâ in denâk nângâm huruŋ huruŋ mannomaihât nanjan. <sup>13</sup> Orotmeme yawu otmâ mannomaihât sâam yingian yakât topne yuwu. Emelâk Anitâne lohimbî tuhuyelehop. Anŋoânâmâ Aram sâam tuhuop. Yakât kakŋan imbijne, kutne Ewa sâam, ya tuhuop. <sup>14</sup> Tuhuyelekmu manowot yamâ anŋoân Satanne Ewa kâitgumu Anitâhât den ya lonŋâem otmu bâleop. Yakât kakŋan Ewane lokne ekumu yâkne imbijahât den watmâ yawuâk otmu bâleop. <sup>15</sup> Yakât otmâ imbilipyenyanje Kiristohâlen biwiyenyanje kepeim loklipyenye yengât amutgen mannomai. Yawu manmâ nan baralipyenye wawaeyekmâ tihityenye otŋetâ yanâmâ Anitâne yekmu ârandân otmu manman kârikŋahât pat kuyingiwuap. Otmu Kiristohâlen biwiyenyanje yawuâk kepeim biwiyenye galemahom manmâ bukulipyenye yengât nângâyinginomai yanâmâ manman kârikŋahât bulâne ya menomai.

### Kiristohât komot yengât kunlipyenye

**3** <sup>1</sup> Den bulâne yuwu sâamune nângâ. Kiristohât komotne lok âlâ me âlâ kunlipyenye sâam katnenekmâ âi ninginetâ hoŋ bayingine sâam otmai ya yengât Anitâne nângâmu âlepne otmap. <sup>2-3</sup> Lok yawuya yengât manmanyenye yakât yuwu sâamune nângâ. To kârikne ki nem biwi hâlim otmai. Me ki kuk kânguruk otmâ lohimbî mem siriken soroken katyekmai. Otmu tewetsenŋahâlâk ki nângâmai. Yâkne târârâhâk manŋetâ ya yengât hakyenjan tosa âlâ ki tetewuap. Otmu bukulipyenye lohotŋan otyinginetâ ya yengât nângâm “lok mulunne” sâamai. Otmu Kiristohât komolân gâtne âlâ me âlâ ya yengât nângâyingim nembe kalem otyingimai. Otmu Anitâ yet Kiristo yetgât den pat topŋambâek kâsikum lohimbî yinginetâ yâkne nângâŋetâ keterakyingimap.

Otmu imbi yâhâp kalimbu ki meyekmai. <sup>4</sup> Biwiyenye galemahom kilik milik manmâ imbi naomlipyenye galempongom tihityenye otŋetâ imbi naomlipyenyanje ewe katyekmâ tem lâuyingimai. <sup>5</sup> Yawu gârâmâ yawu ki otmaine Kiristohât komot yengât galem katyekdâ yâkne lohimbî ki tihityenye otmâ hoŋ bayinginomai. <sup>6</sup> Otmu torokatmâ sâawe. Emelâk Satanne ikŋahâlâk nângâmu yahatmu otmâ hilipguop. Otmu lok âlâ me âlâne Kiristohâlen biwiyenye katŋetâ sâp kâlep ki otmu manmâ gai. Lok yawuya galem katyekdâ yâkne Satanne olop yawu otmai hât kunlipyenye sâam ki katyekbuat. <sup>7</sup> Otmu lohimbî belângen manmaine sâam bâleyinginetâ biwiyenye kum Satangât paŋŋoân kionmai hât Kiristohât

lok âlâ me âlâhât nânġâyîngîjetâ yahatmu eweyîngimai lok yawuya kunlipyeŋe sâm katyekdâ kinnomai.

### **Kiristohât komot yengât hoŋ bawalipyeye**

<sup>8</sup> Aiop, lok âlâ me âlâŋe Kiristohât komot hoŋ bayîngîjet sâm mem katyekbuat ya yengât yuwu sâmune nânġâ. Yâkŋe biwiyeye galemahojetâ manmanyeye kelihakmu lohimbije yekmâ ewe katyekmai. To kârikŋe ki nemai. Me den perâkŋe ki sâmai. Me bukulipyeye yengât iri sikumyeye ki ekŋâlem kâityongom meyingimai. <sup>9</sup> Otmu Wâtġât mâmâŋahât Heakŋe nânġân nânġânyeye mem pâroŋ pilâyîngimu Kiristohât den pat âlepŋe topŋambâek nânġâm yâkâlen biwiyeyeŋe tiŋâk kepeim manmai. Otmu Anitâŋe biwiyeye ekmu ârândân otmap yawu biwiyeyeŋe nânġâmai. <sup>10-12</sup> Yâkŋe imbi yâhâp kalimbu ki meyekmai. Otmu imbi naomlipyeye galemyongom tihityeye otjetâ manmanyeye kelihakmap. Imbilipyeyeŋe gurâ Kiristohâlen biwiyeyeŋe kepeim yâkât nep tiŋâk mem lohimbi hoŋ bayîngimai. To kârikŋe ki nemai. Me den guruk me den belângen ki sâmai. Yawu manmâ biwiyeye galemahojetâ manmanyeye kelihakmu lohimbije yekjetâ yahatmu eweyîngimai. Lok yawuya yengât kutyeye katdâ Kiristohât lohimbije manmanyeye ekjetâ ârândân otbuap. Yâkŋe manmanyeye ekjetâ yawu otmu yanâmâ mem katyekdâ lohimbi hoŋ bayînginomai. <sup>13</sup> Otmu yâkŋe âlonoŋo lohimbi hoŋ bayînginomai yanâmâ lohimbije ewe katyekmâ nânġâyîngîjetâ yahatbuap. Otmu yâkŋe Kiristohâlen biwiyeyeŋe kepeim tem lâuwangim mansai yakât topŋe sâm haok tuhumm lohimbije belângen manmai ekyongomai. Yawu.

### **Yesu Kiristo yâkât topŋe.**

<sup>14</sup> Sâp ki kâlep otmuâk kapi yu pilâm gâhâlen takamune eŋakmâ den otdomġât naŋgan. <sup>15</sup> Yawu gârâmâ mâtâp ki tetenihiwuap otmuâmâ pepa kulemgum katgihian yu sâlikum nenŋe buku orangim orotmeme girawu otmâ manmunŋe Anitâŋe nânġâningimu ârândân otmap yakât Kiristohât lohimbije ekyongorâ nânġânomai. Anitâ Manman Amboŋeŋe nen Kiristohât lohimbije orop tatmap. Yakât otmâ Wâtġât mâmâŋahât Heakŋe Anitâhât biwiŋan nânġân nânġân âlâlâ tatmap ya mem biwinenŋan katmu nenŋe Kiristohât den bulâŋe ya topŋambâek nânġâm lohimbije kâsikum yînginomġât dop tap. <sup>16</sup> Anġoân lohimbije Yesu Kiristohât topŋe ki nânġâŋetâek Anitâŋe hânġângumu ge nengât tosaġât otmâ kawenenŋan kinmu kuŋjetâ muop. Yâkâlen biwinenŋe kepeim manmunŋe Anitâŋe nenekmu ârândân otmap. Yakât nânġâmunnŋe bulâŋe oap.

Yâkŋe lok otmâ hânân ge hohetnenŋan manmu kuŋjetâ muop.

Mumu Wâtġât mâmâŋahât Heakŋe mumuŋambâ mem yahalop.

Yakât otmâ yâkât nângâmunje Anitâhât nanje tâj tâjâk otmap. Yâkne olop miop ya Anitâhât aŋelolipŋaŋe ekŋetâ âlâ kândâkdâ olop. Aposololipŋaŋe topŋe katmâ yâkât den pat âlepŋe sâm haok tuhuŋetâ lohimbî hânŋan kulemŋan manmâ araiŋe nângâŋetâ bulâŋe otmu yâkâlen biwiyeŋaŋe kepeimai. Otmu himbimân âwurem yâhâmu Anitâ orop tawot.

### Lok perâkŋe yengât topyeŋe

**4** <sup>1-2</sup>Anitâhât Wâtgât mâmâŋahât Heakŋe den âlâ biwinan kalop ya sâm tetemune nângâ. Gâmâlâk lok nombotŋaŋe Kiristohât lohimbî yengâlen taka den perâkŋe ekyongoŋetâ nângâm nombotŋaŋe hionakmâ yengâlen torokatnomai. Lok yamâ weke bâleŋe me senduk banearâŋe kakyeŋan memu biwiyeŋe kârikŋe otmu den perâkŋe sâm bukulipyenje kâityongonomai. Kâityongoŋetâ bukulipyenŋe Kiristo betgum yengâlen torokatnomai. <sup>3</sup>Lok perâkŋe yaŋe orotmeme âlâlâŋe mem bâlenenekmap sâm lohimbî ki miaknom sâm samut katmai. Me sot âlâlâ ki nenom sâm samut katmai. Samut katmai yamâ dondâ otmâ hilipgumai yakât yuwu sâmune nângâ. Anitâŋe sot âlek âlek yamâ neneŋeâk hârok sâm katningiop. Neneŋeâmâ sot ketetmâ “Yuâmâ neneŋe” otmu “Yuâmâ ki neneŋe” yawu ki sânom. Nen Kiristohâlen biwinenŋaŋe kepeim yâkât den bulâŋe watmainŋe sot âlek âlek nem Anitâ mepaemain. <sup>4-5</sup>Otmu Anitâŋe wuân me wuân kalop yamâ âlepŋeâk hârok. Neneŋe wuân me wuân nene sâm otnom yamâ aŋgoân Anitâ mepaem yanâmâ nenom. Yawu otnom yanâmâ Anitâŋe nenekmu ârândânŋ otbuap.

### Timoteoŋe yuwu otmâ hoŋ bayiŋgiâkgât kulemguop.

<sup>6</sup>Kiristohâlen biwihe kalonâmbâek neneŋe yâkât den kâsikum gihimunŋe nângâm heŋgeŋgum biwihan katmâ manmâ gat. Yakât otmâ den ekgohoan yu nângâm heŋgeŋgum Kiristo hoŋ bawangim yâkât den yu bukulipge kâsikum yingiwuat yan Kiristoŋe gekmu ârândânŋ otbuap. <sup>7</sup>Yâhâ lok biwiyeŋambâ nângân nângân tâjât topŋe topŋe tetemap yakât gâ orop alahune sâm otnomai yanâmâ ki nângâyingiwuat. Gâŋe Anitâhât tem lâuwangirâ gekmu ârândânŋ otbuap yakât nângârâ keterahâkgât den âlâen hâum sâmune nângâ. Lok sihan kiŋgitŋe orowâkŋe sururuk sânomai. Yawu otnomai yakât nângâm wâtyeŋe houŋ sâmapgât inânŋan dop miakmâ yâhâmai. Yakât dopŋeâk biwihe houŋ sâmapgât Anitâhât den biwihan katmâ lâum manmâ yâhâwuat.

<sup>8</sup>Wâtnenŋe kâriheâk sâm inânŋan dop miakmain yamâ âlepŋe. Yâhâ biwinenŋe Anitâhâlen kârihem kinâk sâm sâp yupâek yâkât den biwinenŋan katmâ lâum manmâ yâhânom yamâ âilonŋo. Yawu otnom yanâmâ manman âlepŋahât bulâŋe âlâlâ teteningimu biwinenŋe sânduk sâmu mannom. Otmu hâmbâi Anitâŋe sâp patoen manman kârikŋan torokatnenekmu manmâ

yâhânom. <sup>9</sup>Den ekgohoan yu nângârâ bulâne otmu yukât biwi yâhâp ki otbuat. <sup>10</sup>Den yu nângâmunje bulâne otmap. Anitâ Manman ambonjaŋe lohimbî kerek menenekmâ manman kârikŋan katnenekmu mannomgât dop tap. Yawu gârâmâ yâkâlen biwinenjaŋe kepeim manmain nenâk menenekmâ manman kârikŋan torokatnenekmu mannom. Yakât nângâm yâkâlen biwinenjaŋe tiŋâk kepeim hoŋ bawaŋgim hâhiwin kakŋan manmain.

<sup>11</sup>Den sâam aran yu Kiristohât lohimbî kâsikum yingirâ lâum mannomai. <sup>12</sup>Lohimbî nombotjaŋe gâhât nângâŋetâ gemu “naom tipije” sâamaihât lohimbî senyeŋan manmâ biwihe galemahom hengeŋgum Kiristohât tem lâuwaŋgim manbuat. Yawu manmâ den lohotŋan ekyongowuat. <sup>13</sup>Sâp kâlep ki otmuâk gâhâlen takawom. Yakât otmâ yuwu otmâ mambotnihim manbuat. Lohimbîje menduhuakmâ Anitâ yet Kiristo mepaeyleknomaiân miti kâsikum yingirâ nângânomai. Otmu den ya tâŋ tâŋâk watmâ orotmeme wuân me wuân otmâ manŋetâ Anitâje yekmu ârândâŋ otbuap yakât ekyongom mem heweweŋ tuhuyekbuat.

<sup>14</sup>Timoteo, emelâk Kiristohât komot ya yeŋgât kunlipyenjaŋe âi sâam gihim kungan mewî. Kungan meŋetâ Wâtgât mâmâŋahât Heakŋe mâmâŋe otgihimu âi girawu mendâ bulâne tetewuap ya yâkŋe biwiyenjaŋ katmu sâam tetem eknongowi. Bulâne ya teteâk sâam âi yakât biwihaje tiŋâk mem tuhuwuat. <sup>15</sup>Emelâk Wâtgât mâmâŋahât Heakŋe mem heweweŋ tuhuhekmu Kiristone olop miop yawuâk otbeâk nângâm otdâ gekmunje tipije âlepŋe olop. Benje yakâlâk nângâm manmâ gat yakât otmâ tat tat mememe ekmunje âilonŋo oap. Otmu yâkâlen biwihaje tiŋâk kepeim manmâ yâhâwuat ya ekmâ Anitâ mepaenom. <sup>16</sup>Kiristohât den ya kelangatmâ kâsikum yingiman sâam biwihe galemahom manbuatgât naŋan. Yiwereŋe yu âi mem mansat yawuâk torokatmâ Kiristohât den kâsikum yingirâ lohimbîje yâkâlen biwiyenjaŋe kepeim manmâ yâhânomai. Yawu otmâ gâ orop meyekmâ manman kârikŋan katyekmu mannomai.

**Timoteone yuwu otmâ Kiristohât komot  
galemyongoâkgât Pauloŋe kulemguop.**

**5** <sup>1-2</sup>Gâŋe Kiristohât lohimbî yeŋgât kunyeŋe otmâ galemyongom mansat. Yakât otmâ yuwu otyingiwuatgât naŋan. Lohimbî âlâ me âlâŋe otŋetâ bâlemu den kâwâ kârik ki otyingiwuat. Lohimbî somboŋe otŋetâ bâlewuap otmuâmâ âwâhe mâmâhe ewe katyelekmâ lohotŋan otyitgimat yawuâk otyingiwuat. Me lohimbî nombotjaŋe otŋetâ bâlewuap otmuâmâ imi atalipge me wârâ toulipge lohotŋan otyingimat yawuâk otyingiwuat. Yâhâ imbi yâhâmâ esep esewâk otyingiwuat.

**Imbi kambut ya yeŋgât sâop.**

<sup>3</sup>Imbi kambut nombotŋe hep torehenlipyenje bia me nimnaom barak manmai yaŋe umburuk manmai hât Kiristohât komot ekyongorâ tihityenje



otnomai. <sup>4</sup>Yâhâ imbi kambut âlâneâmâ nan baralipyene me helipyene rowâk manmai. Yâkne mâmâlipyene me buwulipyene yengât tihityene otmâ hoŋ bayinginetâ Anitâne yekmu ârândâŋ otbuap. Yawu otnomai yan emelâk ŋaŋayenjan âwâ mâmâlipyene me buwulipyene tihityene otbi yakât matŋe yâku sombo otnomaiân tihityene otnomai. <sup>5</sup>Yâhâ imbi kambut nombotŋe hep torehenlipyene bia me nimnaom barak manmai yâkneâmâ Anitâne nâŋgâningiâk sâŋm haoŋmâ ârândâŋ ulitgum mepaemai. <sup>6</sup>Aiop benŋe, imbi kambut nombotŋe âlâneâmâ “umburuk otmâ umatŋe kakŋan manmai hât kâwâ konda otmâ yapâ tewetsenŋe mem dâimai. Kambut yawuŋe yawu manmai yamâ biwiyene mumu hiliwahonomaihât pat manmai. <sup>7</sup>Lohimbi belângen manmaiŋe Kiristohât lohimbi sâŋm bâleyingimaihât imbi kambut manmanŋe jahât den ekgohoan yu gâŋe sâŋm tetem ekyongorâ tem lâunihinetgât naŋgan. <sup>8</sup>Kiristohât lohimbi âlâ me âlâne yeŋe hep torehenlipyene me sese buwulipyene ki tihityene otmâ yaŋeâmâ Kiristo betgum lohimbiŋe Anitâhâlen biwiyene ki kepeim manmai yawu otmâ. Yakât otmâ Anitâne yekmu dondâ bâlemap.

<sup>9</sup>Aiop, imbi kambut âlâ me âlâne Kiristohât komot hoŋ bayingine sâŋm otmâ ya yengât yuwu sâŋmune nâŋgâ. Embâŋâmbâek imbi kambutŋe nep tuhum Kiristohât komot hoŋ bayingim gai. Ya yengât kutyeŋe kulemgum katdâ tatmu tewetsenŋe memai. Otmu imbi kambut ondop yâk yengâlen torokatŋetâ kutyeŋe kulemguwat yamâ yuwu. Imbi kambut âlâ me âlâhât yambuyene 60 otyingiap ya yengât kutyeŋe kulemguwat. Yâhâ lok yâhâp kalimbu ki meyekbi. <sup>10</sup>Orotmemeyene âlepŋe yuwu otŋetâ Kiristohât komotŋe mepaeyekmai. Nan baralipyene âilonŋo galempongom heŋgenŋum gawi. Otmu lomba takanŋetâ emetyenjan dâim yâhâ katyekŋetâ tatŋetâ sot um yingiminiwi. Otmu hewewenŋe otmâ âi âlek âlek mem Kiristohât komot hoŋ bayingim gai. Otmu umatŋe âlâlâ lohimbi kakyenjan yâhâmap yan hewewenâk tânyongomai. Imbi kambut yawu manmâ gai ya yengât kutyeŋe kulemguwat.

<sup>11</sup>Yâhâ imbi kambut hâkyene herone mansai yamâ kutyeŋe ki kulemguwat. Yamâ topŋe yuwuhât. Loklipyene bâleŋetâ Kiristohât nâŋgâm yâkât komot hoŋ bayingine sâŋm biwiyene katmai. Yawu otmâ yamâ gâmâlâk lok yekmâ biwiyene pârâk pilâm Kiristohât nep pilâm lok meyekmai. <sup>12</sup>Kiristohât nep tuhonom sâŋm biwi katbi ya pilai yakât nâŋgâŋetâ biwiyenjan hâumu gorâ kakŋan mannomai. <sup>13</sup>Otmu kutŋan hilâm im tatmâ emet ârândâŋ yâhâŋ gem den golâ, me buku âlâhât den guruk, me den belângen sâsâ yawu sâŋetâ dondâ bâlewuap. <sup>14</sup>Yawu otmai hât Kiristohât komot yuwu sâŋm ekyongohât naŋgan. Lohimbi nombotŋe belângen manmaiŋe Kiristohât komot ya yengât sâŋm bâleyingimaihât imbi kambut yawuŋe lok miakmâ mannomai. Yawu otmâ nimnaomlipyene mem ga katyekmâ galempongom heŋgenŋum

yan tat tat memeyen̄e âilongo teteyin̄giwuap. <sup>15</sup>Yâhâ imbi kambut nombot̄n̄ajeâmâ manman âlep̄nahât mâtâp ya pilâm Manman bâlen̄ahât Ambōne Satan yâkât mâtâp watmai. <sup>16</sup>Otmu Kiristohât komolân gât̄ne imbi âlân̄e ik̄ne hep torehen̄e âlân̄e imbi kambut mansap yakât tihit̄ne otmâ tânguâkgât nan̄gan. Tihit̄ne otbuawân Kiristohât komot̄ne hewewen̄ otmâ imbi kambut nombot̄ne hep torehen̄lipyene barak manmai ya tânyongon̄etâ âilongo otbuap.

**Kiristohât komot yengât galem ya yengât sâop.**

<sup>17-18</sup>Kiristohât komot yengât galemlipyene nepyen̄ahât hâmēne yin̄ginetâ menomaihât yuwu sâmun̄e nân̄gâ. Emelâk Anitân̄e girem den âlâ Mose ekumu kulenguop ya yuwu tap.

“Bulimakaon̄e nep tuhuyin̄giwuap yan sot bulân̄e nemap sâm laun̄e ki sâhâm man̄gunomai.”

Otmu âlâmâ yuwu tap.

“Lok âlâ me âlân̄e nep tuhuyin̄ginomai yakât hâmēne yin̄ginetâ ârândân̄ otbuap.”

Den yawu tap. Yakât otmâ Kiristohât komot yengât galem katyekmâ âi yin̄giwi yan̄e âi ya mem den pat âlep̄ne ya lohimbi belân̄gen mansai ya ekyongomai, me Kiristohât komot den kâsikum yin̄gimai ya yengât âi ek̄jetâ âilongo otmu hâmēne pato yin̄ginomaihât nan̄gan. <sup>19</sup>Otmu lok yâhâp me amon yan̄e galemlipyene yengât topyene teteâkgât sâm hâreyin̄gine sâm otnomai yan denyene ik̄niâk ik̄niâk sâ̄netâ konok otbuap yamâ nân̄gâyin̄giwuat. Yâhâ lok konok̄ne ik̄niâk sâwuap yamâ ki nân̄gâwan̄giwuat. <sup>20</sup>Otmu galemlipyene âlâ me âlân̄e orotmeme bâlene otnomai yamâ meyekmâ lohimbi yengât senyen̄an katyekmâ sâyin̄giwuat. Yawu otyin̄girâ yan lohimbīne ya ekmâ manmanyene galemahonomai.

<sup>21</sup>Nân̄e Anitâ yet Yesu Kiristo otmu an̄elolipyet̄ne koko salehâk ya yengât senyen̄an kinmâ yuwu sâmun̄e nân̄gâ. Galemlipyene âlâ me âlâhât den sâm hâreyin̄giwuat yan den ekgohoan yu tâ̄n tâ̄nâk watbuat. Yawu watmâ lok âlâhât nân̄gârâ yahatmu, âlâhât nân̄gârâ gemu yawu ki otbuat. Den sâm hâreyin̄girâ Anitân̄e nân̄gâmu ârândân̄ olâkgât târârâhâk sâwuat. <sup>22</sup>Galemlipyene âlâ me âlân̄e ot̄jetâ bâleop ya yengât den sâm hâreyin̄girâ nân̄gân̄etâ han̄ sâyin̄gimu manmanyene kelihakmu mansai. Lok yawuya in̄ yawu ki meyek̄jetâ Kutdâhât âi witgum tuhonomai. Manmanyene ekdâ ârândân̄ otmu yâhâp̄ne âi sâm yin̄giwuat. Yawu gârâmâ âi in̄ yawu yin̄girâ âlâkuâk ot̄jetâ bâlewuap yakât tosa yamâ lohimbīne gâhâlen̄ sâm gâitnomai.

<sup>23</sup>Otmu tep kombolahât otmatgât wain to tipin̄e nembuat.

<sup>24</sup>Lok nombot̄n̄aje bukulipyene yengât senyen̄an kinmâ ot̄jetâ bâlemap ya yengât topyene nân̄gâmai. Lok yawuya meyekmâ den âiân̄ katyek̄jetâ sâm hâreyin̄giewalân̄ emelâk topyene nân̄gâwan̄ sâwuat.

Yawu gârâmâ lok nombotŋe âlânjeâmâ topyeŋe kurihiakmâ manmai. Yâhâmâ âi pâi tuhuyeknomai yanâk topyeŋe mem tetewuat. <sup>25</sup>Otmu lohimbi nombotŋe lohimbi senyeŋan kinmâ orotmeme âlepŋe otŋetâ ekmai. Yawu gârâmâ lohimbi nombotŋe orotmemeyeŋe âlepŋe otmai ya ekmâ bukulipyenŋe mepaeyekmai sâm orotmeme âlepŋe ya tihângen otmai. Yamâ lohimbi âlâ me âlânje ya nânŋâm sâm haok tuhumai. Yawu otmai yaŋe tihâk tatbuapgât dop ki tap.

**6** <sup>1</sup>Âi lok yengât sâmune nânŋâ. Kiristohât lohimbi ya den kâsikum yingimain yakât lohimbi belângen manmaiŋe den ya nânŋâŋetâ helekŋe otmu Anitâ sâm bâlewanŋimaihât âi lok nombotŋe Kiristohâlen biwiyeŋe katmaiŋe kunlipeŋe eweyingim lauyeŋe lâum kinmâ âi tuhuyinginomai. <sup>2</sup>Yâhâ kunlipeŋe Kiristohâlen biwiyeŋe kepeim manmai otmuâmâ âi loklipeŋe ya ki holanyekŋetâ ari yeŋe nânŋân nânŋân watmâ galemahom mansai. Yakât otmâ âi lok yaŋe kunlipeŋe ki sâm bâleyinginomai. Yâhâ kunlipeŋe Kiristohâlen biwiyeŋe kepeim manmai yâhâmâ Anitâŋe nânŋâyingimay. Yakât nânŋâm âi lokŋe âi kârikŋeâk mem kunlipeŋe hoŋ bayinginomai. Den ekgohoan yu kâsikum yingirâ nânŋâm manŋetgât nanŋan.

### Senŋe âlâlâ ki ekŋâlem miaknehâlâk nânŋânom.

<sup>3</sup>Kutdânenŋe Yesu Kiristone den âilonŋo aposololipŋe kâsikum yingiminiop yakât nânŋâmunŋe bulânje otmap. Yâkât otmâ lohimbi den ya kâsikum yingimunŋe nânŋâŋetâ bulânje otmap. Yâhâ lok nombotŋe den ya nânŋâŋetâ ki ârândânŋ oap sâm yeŋe engatyenŋeâk watmâ den ondop kâsikum yingimai yamâ dondâ bâlemap. <sup>4</sup>Lok yaŋeâmâ yeŋahât nânŋâŋetâ dondâ yahatmap yamâ den kâsikum yingimai yakât topŋe hâum pâpgumai. Yakât otmâ bukulipyenŋe orop den kakŋan sahanŋinehâlâk nânŋâmai. Yawu otmâ nânŋâm bâleŋim hâiakmâ sâm ge karakmai. Otmu hionakmâ den belângen sâm hakyenŋan sahanŋimai. <sup>5</sup>Yawu otmâ den bulânje pilâm biwi nânŋân nânŋânyeŋe mem heleŋ tuhuakmai. Otmu lohimbiŋe tewetsenŋe ningiŋetâ hâk sânduhân mannehâlâk nânŋâm den kâsikum yingimai.

<sup>6</sup>Nenŋe Kiristohâlen biwinenŋe kepeimain. Yawu otmâ senŋe âlâlâhât ki ekŋâlem manmain yanâmâ Anitâŋe biwi sânduhân katnenekmu biwinenŋe ârândânŋ otmap. <sup>7</sup>Kândikum mâmâlipnenŋe menenekbi yan tepyeŋambâ hâk barak tetewin. Dop yawuâk hâmbâi mum yan hân yu pilâm senŋe âlâlâ ki miakmâ arinom. <sup>8</sup>Yakât otmâ yuwu nanŋan. Anitâŋe sot, me pet sânŋum, me senŋe âlâlâ ya ningimu dopnenŋanâk mem manmain. Otmu “Getek âlâ ningiap,” sâm ki dewaenom. <sup>9</sup>Lohimbi nombotŋe senŋe âlâlâ ekŋâlem miakmâ hâk sânduhânâk manne nânŋâmai. Yawu nânŋâmai yamâ biwi nânŋân nânŋânyeŋe hâlim milim otmu bâleŋahât paŋgoŋân kionŋmai. Otmu

yejahâk yapâ ki holaŋaknomai. Yakât otmâ yanâk tatmâ hiliwahonomai. <sup>10</sup>Yâhâ lok âlâ me âlâŋe senŋe âlâlâ ekŋâlem miakne sâŋ otmai ya yengât biwiyenambâ nâŋgân nâŋgân bâleŋe âlâlâ tetemap. Ya watmâ orotmeme kiŋgoŋ otmai. Yawu otmâ Kiristohât lohimbi nombotŋaŋe yâkât mâtâp pilâŋetâ biwi nâŋgân nâŋgânyeŋe orotok sâmu gorâ kakŋan manmai.

### Pauloŋe Timoteo den ekuop.

<sup>11</sup>Nanne Timoteo, Anitâŋe meŋgekmu hoŋ bawaŋgim mansat. Yakât otmâ gâŋeâmâ orotmeme bâleŋe âlâ me âlâ ekmâ betbaŋgiwuat. Yawu otdâ Anitâŋe gekmu ârândâŋ olâk sâŋ yâkâlen biwihaje tiŋâk kepeim tem lâuwaŋgiwuat. Otmu Kiristohât lohimbi nâŋgâyingim lohotŋan otyiŋgiwuat. Otmu lohimbi belâŋgen manmaiŋe mâtâp maŋguhuhine sâŋ otnomai yakât nâŋgârâ ki sâtŋe otmu biwihe houŋ sâwuap. <sup>12-13</sup>Emelâk Wâtgât mâmâŋahât Heakŋe mem hewewerŋ tuhuhekmu Kiristohâlen biwihe kalon yan nen Kiristohât lohimbi sennenŋan kinmâ “Kutdâne Yesu Kiristo konok hoŋ bawaŋgim manbom,” sâon. Yawu sâon yan Anitâ Manman Amboŋe otmu nanŋe Yesu Kiristoŋe nâŋgâhihimutâ ârândâŋ olop. Emelâk embâŋân Yesu Kiristo ikŋak kiap âlâ, kutŋe Pontio Pilato sâŋ, yâkât senŋan kinmâ Anitâ orop topyetŋe konohâk tap ya ekuop. Anitâ yet Kiristo yâk yetgât sâtŋat otmâ yuwu sâmune nâŋgâ. <sup>14</sup>Yesu Kiristoŋe âwurem ge menenekbuap yakât sâp utâpŋuap. Yakât mambotnomân lohimbiŋe manmange ekŋetâ bâlemu Kiristohât den pat mem ge katmaihât biwihe galemahom târârâhâk manbuat. Yawu manmâ âi gihiwin ya tiŋâk membuat.

<sup>15</sup>Anitâ yahat yahatŋe, lok topŋe topŋe manmâ gai ya yengât kunyeŋe. Otmu lok kutdâ ya yengât kunyeŋe pato. Yâkŋe konok ambonenŋe otmâ tihitnenŋe otmap. Yakât otmâ nâŋgâwaŋgimunŋe âlâ kândâkdâ otmap. Kiristoŋe âwurem ge menenekbuapgât sâp kalop ya ekmu ârândâŋ otbuap yanâmâ âwurem ge menenekbuap. <sup>16</sup>Anitâ Manman Amboŋe ikŋiâk koko salehâk tatmap. Yakât otmâ ikŋak tatmawân laŋinŋe ya lok âlâ me âlâŋe eknomgât dop âlâ ki tap. Ikŋe konok kunnenŋe tatmâ tihitnenŋe otmâ yâhâmbisâpŋat heronŋe nâŋgâwaŋgim mepaem manmâ yâhânom. Ya bonŋanâk.

### Lohimbi iri sikumyeŋe orop mansai ya yengât sâop.

<sup>17</sup>Lohimbi iri sikumyeŋe orop mansai ya yuwu sâŋ ekyongowuatgât naŋgan. Iri sikumyeŋe biatyinŋiwuap. Yakât otmâ hâkyeŋe mepaeakmâ iri sikumyeŋe miakmâ hâk sânduhân manne sâŋ biwiyenŋe yanâk ki katnomai. Anitâ Hop Sambe Amboŋaŋe tihitnenŋe otmâ lâtâpŋongomap. Yâkŋe yawu otmap yakât biwiyenŋe yâkâlenâk kepeim heronŋe nâŋgânomaihât naŋgan. <sup>18</sup>Yawu mannomai yan tepyeŋe hewewerŋ otmu

lohimbi umburuk manmai ya tânyongoŋetâ Anitâŋe yen yekmu ârândân otbuap. <sup>19</sup>Yakât bulâŋe Yesu Kiristoŋe âwurem gewuawân meyekmâ manman kârikŋan katyekmu manmâ yâhâmbisâi.

**Den bâiŋe sâop.**

<sup>20</sup>Nanne Timoteo, emelâk Kiristohât den lohimbi kâsikum yingiwuat sâm âi gihiwan ya biwihâŋe tinjâk mem tuhuwuatgât nanŋan. Otmu lok nombotŋaŋe lokgât nâŋgân nâŋgân tâŋât watmâ den kakŋan sahaŋgimai. Lok yawuyâŋe gâ orop den yawu alahune sâm otŋetâ ki nâŋgâyingiwuat. Yâkŋe topŋambâek nanŋain sâmai yamâ sâm hilipgumai. <sup>21</sup>Lok nombotŋaŋe yawu otmâ Kiristohât mâtâp pilâwi. Bâiŋ.

Anitâ gâ orop talâkgât nanŋan.

Nâ âwâhe,  
Paulo